



Inatsisartuni ilaasortaq  
Ruth Heilmann  
Siumut

## § 37 tunngavigalugu apeqquteqaat – pineqarpoq: Imarsiornermik Ilinniarfik

09. maj 2012  
Sagsnr. 2012-065840  
Dok. Nr. 900898

Asasara Inatsisartuni ilaasortaq Ruth Heilmann, Siumut. Naalakkersuisut sinnerlugit qujassuteqarfigaakkitt, Paamiuni Imarsiornermik Ilinniarfik pillugu apeqquteqaateqarsimaninnut. Matumuuna Naalakkersuisut sinnerlugit apeqquteqaatigisatit akissuteqarfigissavakka:

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: iin@nanoq.gl  
www.nanoq.gl

### Naalakkersuisunut apeqqutit:

1 pillugu:.

1. Ilinniartitaanermut Naalakkersuisup Inatsisartuni saqqummiussassaani Imarsiornermik Ilinniarfiup ukiorpassuarni Paamiuni ineriartortinneqarsimasup pitsaasumillu ingerlanneqartup 2013-mi Nuummumut Sisimiunulluunniit nuunniarneqarnera ilumoortua?

### Akissut:

Ilumoorpoq, uanga Ilinniartitaanermut Naalakkersuisutut, siunnersuuteqarniarlunga pilersaaruteqarama, Paamiuni Imarsiornermik Ilinniarfiup Nuummumut imaluunniit Sisimiunut nuuneqarsinnaanera siunertaralugu.

Naluneqanngitsumik 2012-mi Ilinniartitaanerup Ilusilersoqqinneranut atatillugu Naalakkersuisut ilaatigut pilersaarusiorsimavaat, imarsiornermut ilinniarfiit ataatsimoortillugit inissiisoqarsinnaanissaa, tamatumani eqqarsaatigineqarlutik Imarsiornermik Ilinniarfik (umiarsuarni naalagassatut ilinniarnit ilanngullugu) taamatullu Piniarnermut Aalisarnermullu ilinniarfik.

Tamatumani Naalakkersuisut siunnerfigisimavaat imarsiornermut tunngatillugu ilinniarfiit ataatsimoortillugit kattussuunneqarnissaat.

Taamaatsiinnartartut amerlassusaat, faglig-imik ilinniarnermilu ataatsimoorfusinnaasut killeqarnerat, taamatullu ilinniartitsisussarsiornermi taakkulu atatiinnarniarnanni ajornartorsiutaasartut pisariaqartilersimavaat, Paamiut qimallugit allami inissiisinnaaneq takorloorneqartariaqalersimanera.

Ilinniarfiup taaneqartullu nuuneqarnerisigut ataatsimoortitsilernikkullu, takorloorneqarpoq ilinniarnerminnik taamaastitsiinnartartut ikiliumaartut, taamaattumillu aamma ilinniarnerminnik naammassinnittartut amerlatsikkumaartut. Ilinniarfiit assigiikkannersut ataatsimoortilernerisigut iluaqutissat arlaqartussaapput, soorlu ilinniartut amerlanerulernermikkut ajunngitsumik imminnut sunneqatigiittarsinnaanissaat, taamatullu akuttunngitsumik ilinniartitsisussanik pissarsiortarnermi ajornartorsiutaasartut ikinnerulersinnaanissaat aqutissiuunniarneqarpoq, tamakkulu tamarmik nassatarisussaassavaat ilinniartitaanermut aningaasaliissutaasartut maanamut sanilliullugu atorluanerusoqarsinnaalernissaa.

Imarsiornermik ilinniarfiit ataatsimuulersinneqarnerisugut pitsaaqutissat makku taaneqarsinnaapput:

- ilinniartitsisoqatigiinnik ataatsimoorussanillu siunnersuisunik pilersitsineq, sumut ilinniagaqartoqarnera apequtaatippallaarnagu iluaqutigineqartussanik
- illoqarnikkut ataatsimoortitsineq – init ilinniarfiit, sakkutigut ilinniarfiit il.il. tamanit iluaqutigineqarsinnaalernissaat
- fag-it assigiinngitsut eqqarsaatigalugit imminnut tapitartuuteqatigiissillugit ingerlatsisoqarsinnaalernissaa, ilinniagaqartullu akunnerminni ilorraap tungaanut sunneqatigiittarsinnaasarnissaat
- allaffissornikkut ataatsimoorussineq

2 pillugu.

2. Ilinniarfiup taama Paamiunut pingaaruteqartigisup illoqarfimmut alamut nuunniarneqarnera qanoq piareersaateqarfigineqarsimava?

**Akissut:**

Manna tikillugu Imarsiornermik Ilinniarfiup Paamiuniit nuuneqarsinnaanera pillugu annertunerusumik pilersaarusiortoqarnikuunngilaq. Taamaattorlu oqaatsigineqartariaqarluni, suleqatigiissitat nuussisoqarsinnaanera pillugu misissuisussatut sulisineqarsimasut, Imarsiornermik Ilinniarfiup Paamiuniit nuuneqarsinnaanera inasutigisimammassuk, tungavilersuutigalugu imarsiornermut tunngatillugu ataatsimoorussamik ilinniarfiliortoqarnissaa, taannalu Paamiuni inissisimasussatut inasutigerusunneqanngitsoq.

Uanga Ilinniartitaanermut Naalakkersuisutut suleqatigiissitat taamatut inassuteqarnerat isumaqatigaara, taamaattumillu pilersaarutigalugu Naalakkersuisunut tamanna pillugu siunnersuuteqarnissara, tamatumali kingunerisaanik Paamiut qimallugu ilinniarfimmik inissiiinissamut tunngatillugu pilersaarusiornissat aallartinneqassasut.

3 + 4 pillugit.

3. Paamiuni innuttaasut minnerunngitsumillu Imarsiornemik Ilinniarfimmi ilinniartitsisut sulisullu allat matusiniarneq pillugu isumasiorneqarsimappat?
- 4 Kommunalbestyrelsemi ilaasortat aammalu Kommuneqarfik Sermersuumi borgmesteri Paamiuni Imarsiornermik Ilinniarfiup illoqarfimmut allamut nuunniarneqarnera pillugu isummersorneqarsimappat?

**Akissut:**

Naalakkersuisut sulii aalajangiiffingilaat, ilumut Imarsiornermik Ilinniarfik Paamiuniit nuunneqartariaqarnerisooq. Taamaattumik Naalakkersuisut sulii Kommuneqarfik Sermersooq akulerutsissimangilaat.

5 pillugu.

- 5 Imarsiornermik Ilinniarfiup illoqarfimmut allamut nuunniarneqarnera qanoq angitigisumik landskase-mut aningaasartuuteqarfigineqarnissaa naatsorsorneqareersimava? Taamaasimappat aningaasat qanoq atorineqartussat amerlatigaat aammalu nuussiniarneq akissaqartinneqarpa?

**Akissut:**

Ulloq manna tikillugu Imarsiornermik Ilinniarfiup nuunneqarsinnaanera pillugu Naalakkersuisut isummersimangimmata, nuussisoqassappat qanoq Landskarsimut akeqartussaassanersut sulii naatsorsuisoqarsimangilaq.

Naalakkersuisut isumaat uaniippoq, Imarsiornermik Ilinniarfiup nuunneqarnera ungasinnerusooq eqqarsaatigalugu inuiaqatigiinnut akikinnerujumaartoq. Tamatumani anguneqassamat, atuaqatigiiaat amerlanerusut pilersinneqarnissaat, taamaastitsiinnartartut ikilinnissaat, allaffissornikkut ingerlatseqatigiinnikkut sipaar-toqarsinnaanissaa allatigullu iluaqusiisoqarsinnaanissaa.

6 pillugu.

6. Inuutissarsiorneq eqqarsaatigalugu Paamiut illoqarfittut annaasassaa angisooq pillugu taartissaanik sunik pilersaaruteqartoqarpa?

**Akissut:**

Naalackersuisut isumaqanngillat, inuiaqatigiit tamarmiusut isigalugit ilinniarfiit pineqartut nuunneqarnerisigut annaasaqartoqarumaartoq. Tamatumani aallaavigineqassammata tunngavilersuutit tutsuiginartut, taamatullu ilinniartitaanikkut sammineqartut annertusarneqarnissaat. Maannangaaq arlaatigut takorluuinnittoqanngilaq, Paamiut illoqarfiani ilinniartitaanikkut pilersitsisoqarumaarnersoq.

Inussiarnersumik inuulluaqqusilluta



Palle Christiansen

Ilinniartitaanermut Ilisimatusarnermullu Naalackersuisoq